

Chóiq Alang Phau-lô Taran Cơiq Dyôn Ticuoi Tin Tớq Vel **Cô-lusê** **Parnai Cato**

Phau-lô taran chóiq alang ndô cơiq alang top tin tớq vel Cô-lusê, cruong Asie. Án taran sám 60 cumo vít Yê-su carnian. Án taran parnai ndô co án sáng hanh bôn máh ticuoi cato nha-án lóiq piaiq te parnai Yang Arbang-pilöng. Nha-án cato ticuoi tin cóq dyám náp alứng sang tarneng Yang Arbang-pilöng, alứng cóq táq rit kít veng phep rit Isa-ra-el. Ticuoi ngki cato bôn a-uri nôh crong tanna la tán, alứng nha-án cato a-uri callong cannõh ho.

Phau-lô taran máh callong piaiq lư dőq chíl lieh máh callong ngki. Án cato te Yê-su Crit bôn chức dyôn he bôn ráp callong tumõng nhơ te Crit. Máh parnai ndon ngai cato lóiq piaiq táq dyôn top tin cốt paryáh, dyo' át yông te Yang Arbang-pilöng. Co nhơ te Yê-su, Yang Arbang-pilöng teng pilöng cuteq; alứng co nhơ te Yê-su, Yang Arbang-pilöng pachúng pachúrm cúp náq ticuoi dyôn píh lieh nga án. Núm Yê-su ráp têq dyôn ticuoi bôn tumõng níc-níc. Phau-lô cato te a-uri callong dyôn he ial tóc tớq pang tumõng he.

¹ Cư Phau-lô taran chóiq alang ndô. Cư la ticuoi Yang Arbang-pilöng rêu dyôn cốt dyưng

ati Yê-su. Alúng Ti-muthê em ai he, án cahanh inha tui.

² Cư taran chóiq alang ndô coiq alang top tin ndon veng Crit nhéq te tarngúh tarho át tóq vel Cô-lusê. Cư seq Yang Arbang-pilöng A-ám he, choi mat inha alúng dyön inha át bánh suanh ien ǒ níc.

Phau-lô Córú Dyön Top Tin Tóq Vel Cô-lusê

³ Tóq he cörü dyön inha, he si-ɔn níc Yang Arbang-pilöng, A-ám Yê-su Crit Ulla he, ⁴ co he khóiq sáng dyo inha lư tin Yê-su Crit, alúng inha bôn mít cannính amoih nhéq máh ticuoi ndon tin Yê-su. ⁵ Inha bôn mít cannính iki, co inha khóiq sáng dyo parnai piaiq, la parnai ǒ te Yang Arbang-pilöng; inha chom án khóiq thuan dőq callong búñ dyön inha tóq pilöng. ⁶ Parnai ǒ te Yang Arbang-pilöng lư tóq nga cruong cannöh hơ aróq khóiq tóq nga inha. Alúng parnai ndô cốt culái alúng cốt rúh asór tóq cúp cruong, muchứng án cốt culái tóq mít cannính inha tui te ingái inha khóiq sáng alúng chom arlóih lư parnai piaiq te Yang Arbang-pilöng choi mat inha. ⁷ Parnai ndô inha khóiq sáng te Ê-phapra, la yóu artoi lư alúng cư. He bar náq sõng munoi táq arnáq dyön Crit. Ê-phapra cato inha parnai ndô tang cư, co cư lóiq têq tóq nga inha. ⁸ Alúng Ê-phapra tông lieh dyön he chom Arvai Yang Arbang-pilöng khóiq dyön inha bôn mít cannính amoih.

⁹ Iki, te ingái he sáng parnai ngki, he cörü níc dyön inha. He seq Yang Arbang-pilöng dyön inha chom a-urí hơn lư loi te máh nôh ndon Yang

Arbang-pilǒng sáng ính, alúng he seq dyôn inha cốt tubáiq alúng chom arlóih lư loi nhơ te Arvai Yang Arbang-pilǒng choi inha. ¹⁰ He cóu iki dőq inha têq táq pôq piaiq níc chứng mát Ulla he, dyôn án bôn mít cannính bui níc alúng inha, alúng dyôn inha cốt culái te arnáq ǒ inha táq. Alúng he seq án dyôn inha chom a-uri lư loi te ngê Yang Arbang-pilǒng. ¹¹ He seq Yang Arbang-pilǒng dyôn chức án choi níc inha. Chức án ang-ur cluri nhéq te chức cannõh. Khán inha bôn chức ndô, inha rap chiuq níc cúp nõh dieiq arúrc, ma inha nnáng sáng bui. ¹² Alúng he si-on Yang Arbang-pilǒng A-ám he, án dyôn inha bôn ráp tui máh mun án ính dyôn nhéq máh top tin Yê-su la nha-án ndon bôn át tóq ntúq tráh ang, la ntúq Yê-su táq sút. ¹³ Án khoiq choi he dyôn tarcláh te chức yang saq ndon táq sút tóq ntúq ngiau. Alúng án khoiq dyôn Yê-su Crit la Acáí án ndon án amoih lư táq sút he. ¹⁴ Co nhơ te Yê-su khoiq cuchet tang he, iki Yang Arbang-pilǒng khoiq thái lieh he alúng tách luaih he.

Phau-lô Cato Te Crit

¹⁵ Lóiq bôn nnáu cơi hôm Yang Arbang-pilǒng. Ma ticuoi mmo hôm Crit la muchúng án khoiq hôm Yang Arbang-pilǒng tui. Alúng Crit át munoi alúng Yang Arbang-pilǒng te ingái Yang Arbang-pilǒng iyôh teng mui nõh amôr. ¹⁶ Co nhơ te Crit, Yang Arbang-pilǒng teng nhéq máh nõh tóq pilǒng alúng tóq cúc cuteq ndô, máh nõh he têq hôm alúng máh nõh he lóiq têq hôm. Yang Arbang-pilǒng táp teng nhéq nõh sút alúng

nhéq nőh chức tớq tanieng alúng tớq tadup nhơ te Crit alúng dőq dyôn Crit. ¹⁷ Crit khoiq bôn dyo te nsuoi Yang Arbang-pilöng iyőh teng máh nőh ngki. Alúng Crit kiaq me cùp nőh dyôn át carsiat ö. ¹⁸ Ticuoi cóq bôn plô, ki-náq têq tumöng; muchüng ngki tui máh top tin cóq bôn Crit, ki-náq têq bôn tumöng nic-nic. Yê-su Crit la aróq plô máh top tin. Te nsuoi, án táp cuchet alúng têq tumöng lieh. Co iki án cöt put hơnhnéq te nőh cannöh. ¹⁹ Yang Arbang-pilöng sáng bui canninh dyôn Acái án bôn cùp nőh muchüng án tui. ²⁰ Alúng co nhơ te Crit, Yang Arbang-pilöng dyôn cùp nőh tớq cúc cuteq ndô alúng tớq pilöng cöt artoi lieh alúng án. Án táq iki, co nhơ te Acái án khoiq cuchet na ngôh aham tớq along calláng.

²¹ Te nsuoi inha át yông lư te Yang Arbang-pilöng, alúng mít canninh inha cöt picon nic ada Yang Arbang-pilöng la co tian inha táq arnáq saq. ²² Ma to Yê-su táp khoiq chiuq cuchet dőq dyôn inha têq cöt artoi lieh alúng Yang Arbang-pilöng. Án táq dyôn inha têq tayüng chüng mát Yang Arbang-pilöng la co inha bôn mít prah ö, óq callong têq tíq inha, alúng Yang Arbang-pilöng lóiq hôm inha bôn luaih. ²³ Inha lư têq tayüng chüng mát án, khán inha tin nic parnai ö te Yê-su Crit, alúng mít inha vững aróq along bôn riaih cuchot sru. Iki lóiq bôn ngai têq tardöng inha dyôn tách máh nőh inha ngcong te parnai ö Yang Arbang-pilöng, dyo táq veng parnai cannöh loi. Parnai ö te Yê-su Crit ndon inha khoiq sáng, lư parnai ndô tớq nga cùp náq ticuoi tớq cúc cuteq ndô hơ. Cư Phau-lô táp la ticuoi döng parnai ö

ngki.

Yang Arbang-pilǒng Rêh Phau-lô Dyôn Táq Arnáq Án

²⁴ Hoi-ndô cûr sáng bui cannínch chiuq máh dieiq arúc dőq choi inha. Máh callong dieiq arúc ndon Yê-su khoiq chiuq, la án chiuq dőq choi top tin. Ma hoi-ndô cûr loi chiuq máh callong dieiq arúc ngki. ²⁵ Yang Arbang-pilǒng khoiq rêm cûr dyôn táq arnáq dőq choi top tin. Arnáq ngki la dyôn inha chom arlöih arlêng máh parnai án. ²⁶ Te inóh parnai ndô aróq ngai catôq dőq te a-úi pang ticuoi, lóiq iyôh dyôn ticuoi chom. Ma hoi-ndô Yang Arbang-pilǒng apáh dyôn máh ticuoi tin Yê-su chom parnai ndô. ²⁷ Yang Arbang-pilǒng ính máh ticuoi tin chom máh parnai catôq ngki la bôn nôh ayáu lư. Alúng Yang Arbang-pilǒng dyôn ticuoi tói ticuoi Isa-ra-el chom tui te nôh ngki. Nôh ngki la Crit át tóq mít cannínch inha. Iki inha ngcong bôn át munoi alúng án tóq ntúq ang-ur tóq pilǒng. ²⁸ He cato níc te Crit alúng catóih tông nhéq máh ticuoi na parnai tubáiq, co he ính nha-án cöt sasai tóq ngê Crit. ²⁹ Hôm cûr rap catóng táq níc arnáq ndô la co nhô Crit choi mít cannínch cûr dyôn bôn rêng rap táq.

2

¹ Cûr ính inha chom arlöih lư te mít cannínch cûr. Mít cûr ính lư choi inha, alúng cûr ính tui choi máh ticuoi tin át tóq vel Lau-dusie, díh nha-án ndon lóiq nai hôm cûr hơ. ² Cûr ính nha-án bôn mui mít, munáq choi munáq, munáq khêr munáq. Cûr ính lư nha-án chom tituaiq bôm te ngê ayáu,

dőq nha-án têq chom arlóih lư ngê catőq te Yang Arbang-pilǒng. Ngê catőq ndô la Crit. ³ Co nhơ te Crit he bôn cùp nőh ayáu. Nőh ayáu ngki la callong tubáiq alúng callong têq apúh te ngê Yang Arbang-pilǒng.

⁴ Cư tông inha parnai ngki, co cư adáh ticuoi cannőh tóq nga inha tông parnai êm lư, ính inha veng ngê nha-án. ⁵ Hoi-ndô cháq cư lóiq át alúng inha, ma mít cannính cư át níc alúng inha. Alúng cư sáng bui lư khán mít inha át vững ጀ, alúng capol níc máh ngê inha khoiq tin te Crit.

Bôn Crit La Cúp Dyo

⁶ Máh parnai inha khoiq tin te Yê-su Crit Ulla he, cóq inha táq pôq veng níc parnai ngki. ⁷ Cóq inha dyôn parnai ngki dách sru tóq mít inha, alúng cóq inha cốt pút asór tóq callong tin, aróq ngai khoiq cato inha dyo. Alúng cóq inha bôn mít cannính si-ơn níc.

⁸ Cóq inha me a-ጀ, dách lơ bôn ticuoi ial tóiq ngê ndô te mít cannính inha. Ticuoi ngki tông hôi alúng êm lư ada inha, ma parnai ngki la parnai tarthu sống, alúng lóiq bôn tarnáp amóh. Nha-án ngki veng phep rit ticuoi alúng ngê tóq pang ndô sống, nha-án lóiq veng ngê Crit. ⁹ Co cùp nőh ndon cốt na Yang Arbang-pilǒng, la át nhéq alúng Crit ndóng án cốt ticuoi. ¹⁰ Khán inha bôn Crit tóq mít cannính, lư inha bôn cùp nőh dyo, lóiq bôn clóiq mui nőh amóh nnáng, co Crit cốt ulla nhéq máh nőh sút alúng máh nőh chức.

¹¹ Veng phep rit Isa-ra-el, nha-án táq rit kít táq tíc tóq cháq. Inha bôn tui tíc, ma tíc ngki

tới tíc ticuoi táq. Tíc ngki Crit táp táq dyôn inha, alứng tíc ngki la inha táh nhéq máh ngê tieq. ¹² Ndóng inha ráp tíc na dőq la aróq ngai túp inha munoi alứng Crit; alứng aróq inha tumõng lieh munoi alứng Crit, co inha tin chức na Yang Arbang-pilõng táq dyôn Crit tumõng lieh te cuchet. ¹³ Te nsuoi la aróq inha cuchet, co inha táq a-ui arnáq luaih alứng lóiq táq veng phep rit Yang Arbang-pilõng khoiq dyôn ticuoi Isa-ra-el. Ma Yang Arbang-pilõng táq dyôn inha tumõng lieh munoi alứng Crit, alứng án khoiq táh nhéq máh luaih he. ¹⁴ Cư acám idô: Máh nőh amóh he táq luaih ada Yang Arbang-pilõng, la aróq Yang Arbang-pilõng khoiq taran nhéq máh nőh ngki tóq púng uráq. Dyo' án ial púng ngki téh dőq tóq along calláng Crit. Dyo' Crit cuchet dőq pupít nhéq máh luaih ngki. ¹⁵ Tóq Crit cuchet, án apáh dyôn nhéq tûh ticuoi hôm án khoiq chíl rap nhéq máh nőh chức alứng nhéq máh nőh sút, co nhơ te án cuchet alứng tumõng lieh.

¹⁶ Co iki, inha êq náp parnai ngai tíq inha te crøng inha ngoiq lóiq la cha, alứng te ingái cha bui Kisái Ngõh Tamme, lóiq la ingái angô dőq sang tám Yang Arbang-pilõng, lóiq la ingái cha bui dőq ayu' án. ¹⁷ Máh nőh ngki cốt aróq mol dyôn máh ticuoi tóq pang tatuñ têq chom arlóih. Ma callong lú la Crit. ¹⁸ Iki inha êq dyôn nha-án bôn tíq inha táq lóiq piaiq, alứng inha êq náp parnai nha-án tông, co nha-án ính inha táq dieiq arúc ada cháq inha bôm ính veng ngê Yang Arbang-pilõng. Nha-án tông inha cóq táq iki, alứng ính tardõng inha sang tám tarneng

Yang Arbang-pilõng. Nha-án tông, nha-án chom ngê Yang Arbang-pilõng, co nha-án khoiq hôm Yang Arbang-pilõng apáh ada nha-án. Iki nha-án parngih nha-án püt hñor, alüng chom a-üri hñor te ticuoi cannõh. Ma nha-án parngih iki la lóiq piaiq. ¹⁹ Nha-án khoiq partáh te Yê-su Crit. Iki nha-án la aróq ticuoi óq plô. Yê-su la aróq plô, alüng top tin la aróq cháq án. Ticuoi cóq bôn plô, ki-náq têq tumõng alüng püt asór. Muchúng ngki tui, khán Yê-su Crit cöt sút he, ngki he têq bôn mui mít mui canninh, alüng he têq cöt püt asór tóq ngê Yang Arbang-pilõng.

He Cuchet Alüng Tumõng Lieh Munoi Alüng Crit

²⁰ Khán inha khoiq cuchet munoi alüng Crit, alüng khoiq tarcláh te chức yang saq tóq pang ndô, iki imo têq ngai patot inha cóq veng phep rit tóq pang ndô? ²¹ Phep rit ngki tông idô: “Êq ial! Êq cha chim! Êq capoiq!”

²² Ma máh nõh ndô, uróh cöt pít nhéq. Alüng phep rit ngki chóng ngõh te ngcang ticuoi sống. ²³ Inha sáng parnai nha-án la aróq piaiq tui. Nha-án khoiq teng táq bôm rit sang, nha-án táq náh-nnan asiar cháq, alüng nha-án patáp inha dyón táq dieiq arúc cháq inha bôm. Ma parnai ngki lóiq bôn tarnáp amóh, alüng lóiq têq choi amóh dyón ticuoi têq viar vít te ngê saq.

3

¹ Co inha khoiq tumõng lieh munoi alüng Crit, cóq inha suo máh nõh tóq pilõng nga ntúq Yê-

su ticu pa atóm Yang Arbang-pilöng. ² Cóq inha tituaiq níc te máh nőh tóq tanieng. Èq tituaiq máh nőh tóq pang ndô. ³ Inha la aróq khoiq cuchet dyo', alúng pang tumöng inha la aróq catőq clôp tóq Crit, co inha át mui mít alúng Yang Arbang-pilöng. ⁴ Tóq ingái Crit, án ndon tumöng níc tóq lieh nga cúc cuteq ndô, ingái ngki ngai lư hôm inha át munöi alúng án ndon bôn chức ang-ur lư, alúng inha cốt aróq án tui.

Ngê Tieq Alúng Ngê Tamme

⁵ Co iki, cóq inha táh nhéq máh ngê tóq pang ndô. Ngê ngki la idô: Tói campái cayieq ma bíq munöi, táq arnáq tanghang, arváiq arcoiq ính bôn ngai, ính táq arnáq saq, alúng ham crong ntûn tóq pang ndô. Ticuoi mmo ham crong ntûn tóq pang ndô, la aróq án sang yang cannöh. ⁶ Co te máh nőh ngki Yang Arbang-pilöng sâng nháih lư ada máh ticuoi ndon lóiq peh parnai án. ⁷ Te nsuoi inha báq táq tui máh nőh ngki, ndóng inha yôl veng ngê tieq.

⁸ Ma hoi-ndô cóq inha táh viang máh nőh idô: A-ính ngai, nháih ada ngai, ính táq ngai, acraiq ngai, alúng táq-ntêr mmuaaq. ⁹ Cóq munáq êq táq-ntêr a-uai ada munáq, co inha khoiq táh dyo' ngê tieq alúng arnáq tieq. ¹⁰ Alúng inha khoiq ial dyo' ngê tamme. Ngê tamme ndô la Yang Arbang-pilöng pien he dyôn cốt aróq án, dök he têq bôn chom a-uri lư loi te ngê án ndon khoiq teng he. ¹¹ Ticuoi mmo bôn ngê tamme ndô, lóiq ndái amóh tam án la ticuoi Isa-ra-el, lóiq la tói ticuoi Isa-ra-el; tam án khoiq táq rit kít, lóiq la lóiq bôn

táq; tam án la te cruong Créc, lóiq la cruong Rôma, lóiq la te cruong cannōh; tam án la ticuoi sol, lóiq la tới ticuoi sol. Khán án bôn Crit át tóq mít cannính án, ndô la cùp dyo, co Crit la sút püt cliei nhéq te cannōh, alứng Crit át tóq mít cannính cùp náq inha.

¹² Co Yang Arbang-pilōng amoih inha, iki án rêm inha. Án dőq inha mmar te ticuoi cannōh dyôn inha táq arnáq án sống. Iki cóq inha ial mít cannính idô: Sruiq táq, tarchoi, lóiq pupüt, lamböt, alứng chiuq tanhir. ¹³ Cóq inha munáq chiuq munáq, alứng munáq tách luaih munáq. Khán bôn ticuoi mmo táq luaih ada inha, inha êq náp luaih ticuoi ngki. Aróq Ulla khoiq tách luaih inha, muchúng ngki tui cóq inha tách luaih ngai táq ada inha. ¹⁴ Alứng cliei te máh nőh ngki loi, cóq inha ial mít cannính amoih. Co callong amoih cốt aróq ntár chóq cùp náq inha munoi, dyôn têq cốt mui mui cannính át artoi níc alứng yóu. ¹⁵ Cóq inha dyôn callong ien ő te Crit cốt ulla tóq mít cannính inha. Yang Arbang-pilōng arô inha, la co án ính inha át artoi alứng bôn mui mui cannính. Alứng cóq inha bôn mít cannính si-ơn níc. ¹⁶ Cóq inha dyôn parnai Crit cốt khóm lư tóq mít cannính inha, dőq inha cốt tubáiq, dyo têq munáq catóih munáq, munáq dyöq munáq. Cóq inha cùh máh alhoiq ayô Yang Arbang-pilōng lóiq la cato te ngê án. Alứng tóq inha cùh, cóq inha bôn mít cannính si-ơn án. ¹⁷ Parnai amôh inha tông, alứng arnáq amôh inha táq, cóq inha táq nhơ te nőh Yê-su Ulla he. Alứng ntônh inha táq ntônh inha si-ơn Yang

Arbang-pilōng A-ám he, nhơ te Yê-su.

Ngê At Artoi Alúng Ticuoi Mui Abóh

¹⁸ Máh inha ndon campái, cóq inha ial cannính cayieq inha. Khán inha táq iki la piaiq dyôn inha ndon khoiq tin Ulla.

¹⁹ Máh inha ndon cayieq, cóq inha amoih campái inha. Alúng inha êq dông dieiq arúc campái inha.

²⁰ Máh inha ndon acái acon, cóq inha peh láih parnai a-i a-ám inha, co arnáq ndô táq dyôn bui cannính Yang Arbang-pilōng.

²¹ Máh inha ndon a-ám, cóq inha êq tar-ac acái inha, dách lơ nha-án sáng pê cannính.

²² Máh inha ndon ticuoi sol, cóq inha peh láih parnai ulla inha tớq pang ndô, máh arnáq nha-án yua inha táq. Inha êq táq arnáq ő nûm chưng mát nha-án sóng, ính nha-án ayô inha. Ma cóq inha táq nhéq mít cannính inha, co inha dyám náp Yang Arbang-pilōng. ²³ Amóh inha táq, cóq inha táq nhéq tarngúh tarhơ. Co arnáq inha táq la dyôn Yang Arbang-pilōng, tới dyôn ticuoi.

²⁴ Inha chom dyo, Yang Arbang-pilōng ính dyôn inha bôn mun te án; mun ngki la cõng inha. Ulla inha la Yê-su Crit, alúng inha táq arnáq dyôn án. ²⁵ Ma ticuoi mmo táq arnáq saq, Yang Arbang-pilōng lư culieh dyôn án cõng saq; co Yang Arbang-pilōng culieh cõng la veng lieh máh arnáq ticuoi khoiq táq.

4

¹ Máh inha ndon ticuoi u'lla, cóq inha táq tinóng ő alúng táq li-arli ada sol inha. Co inha chom, inha bôn tui U'lla. U'lla inha át tóq pilöng.

Phau-lô Seq Nha-án Cór Choi An

² Inha êq sáng aleq cörü. Ma cóq inha cörü seq nhéq te mít canninh inha. Inha êq cörü tóq ngcang sống. Alúng cóq inha cörü si-ơn hơ. ³ Seq inha cörü choi he, seq Yang Arbang-pilöng pöh carna dyön he têq cato ngê catőq te Crit. Co tian cư cato ngê ngki, ngai crál cư tóq coq tôt. ⁴ Cóq inha seq Yang Arbang-pilöng choi cư dyön cư têq cato arlóih lư te ngê catőq ngki, co piaiq lư cư cato arlóih te ngê ngki.

⁵ Cóq inha át partát ő ada ticuoi lóiq tin. Alúng ndóng inha têq cato, cóq inha cato ráp. ⁶ Cóq inha táq-ntêr êm parnai, aróq arváih khoiq ngai cacháq boi, dőq têq inha chom callong mmo ő dyön inha ôi máh ticuoi cannöh.

Parnai Alang Top Cô-lusê

⁷ Cư khoiq yua Ti-chacơ dyön tông inha chom te cư. Án la em ai ndon cư amoih lư. Alúng án táq mmín lư arnáq Yang Arbang-pilöng munoi alúng cư. ⁸ Cư khoiq yua án tóq nga inha dőq tông inha chom te máh arnáq ndon tóq nga cư, alúng cư yua án khêr inha. ⁹ Alúng cư yua Ô-nasim hơ tóq nga inha. Án la em ai ndon cư amoih tui, alúng án la ticuoi partát lư. Te nsuoi án át mui vel alúng inha. Dyør nha-án bar náq ndô ính tông dyön inha chom máh arnáq ndon cốt tóq ntúq ndô.

¹⁰ Ari-tac át tôt munoi alứng cư. Án coiq parnai alang inha. Alứng Mac coiq parnai alang inha tui, án la em ai Ba-naba. Te nsuoi, cư khoiq tông inha dyo te án; khán án tóq nga inha, cóq inha cayúng án dyôn át alứng inha. ¹¹ Alứng Yô-sua, ngai dőq Yutu hơ, án coiq parnai alang inha tui. Nûm nha-án pe náq sống la ticuoi Isa-ra-el ndon tarchoi cư táq arnáq Yang Arbang-pilöng, alứng nha-án khêr mít canninh cư.

¹² È-phapra la te top inha tui, alứng án sòng táq arnáq Yê-su Crit. Án coiq parnai alang inha tui, alứng án cóu níc dyôn inha nhéq mít canninh. Án báq cóu seq Yang Arbang-pilöng dyôn inha têq át partát ő, lóiq clóiq mui nôh amóh te máh ngê Yang Arbang-pilöng ính inha veng. ¹³ Cư tông dyôn inha chom te È-phapra, án amoih lư inha alứng án choi inha. Díh án amoih alứng choi máh ticuoi ndon át tóq vel Lau-dusie alứng vel Hier-pulit. ¹⁴ Luca alứng Dê-ma ính alang inha tui. Luca la ticuoi palai ndon he amoih lư.

¹⁵ Seq inha pasôl ő máh em ai he tóq top tin ndon át vel Lau-dusie. Alứng seq inha pasôl ő Numpha alứng top tin ndon rum tóq dung án. ¹⁶ Cua inha dốc parnai alang ndô, ngki cư seq inha coiq dyôn ticuoi tin tóq vel Lau-dusie loi, dyôn nha-án bôn dốc tui. Alứng seq inha ial chóiq alang ndon cư taran dyôn nha-án, dyo dốc chóiq alang ngki. ¹⁷ Seq inha tông Archip idô: “Cóq mái me simört te arnáq Yang Arbang-pilöng dyôn mái táq, alứng cóq mái táq dyôn cua arnáq ngki.”

¹⁸ Ma parnai alang talloiq ndô la ati cû Phau-lô
táp taran. Cû seq inha ayû, cû yôl át tóq coq tôt.
Cû seq Yang Arbang-pilóng Choi mat inha.

**Parnai Yang Arbang-pilǒng: Tám Uraq
Tamme Cang Cadô
Pacoh: Parnai Yang Arbang-pilǒng: Tám Uraq
Tamme Cang Cadô (Bible)**

copyright © 2019 Wycliffe Bible Translators, Inc.

Language: (Pacoh)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022
81799e9a-66b4-5f52-ad41-286ef093d83d